

## Afterm Zuch ...

hawwe merr noch e bisje in de Hauptstrooß sesomme gestonne unn hawwe uns iwver de Fassenachtszuch unnerhalle. Mir warn uns oonich, dass die Flerschemer dissmol nit nor e prima Wedder hadde, naa, sie hadde aach enn besonnens scheene Zuch.

Vor alle Dinge, moont de Schorsch, hier in de Hauptstrooß in de Näh von de Kerch warrer dissjohr noch schee beisomme. Dess war nit immer so, monchmol isser zimmlich verroppt hier ookumme, doo war die oo Zuchnummer schunn hinnerm Bäcker Scherer verschwunne unn die nächst hosde on de Milchkich noch nit kumme seh. Dess war nix.

Die Paula war nit gonz so kritisch. Monchmol war aach dess Wedder droo schuld. Wenns nass odder schmuddelich unn debei noch kalt war unn weil om End von de Hauptstrooß Schluss iss, wolde die Leit halt so schnell wie möchlich ihn Zuchweech hinner sich kriehe. Awwer dissjohr hott alles gestimmt, die Organisation hott prima geklappt.

Ich saach: Außerdem hadde merr hier on de Kerchemauer den junge Kerl, der mett mords Lautsprecher e schee Musik gemacht hott. Unn wie der bei jeder Geleechenheit die Leit hott ‚Hall die Gail‘ rufe losse, dess hott Stimmung gewwe.

De Schorsch druff: Unn wie der die Zuchnummern oogesacht hott. Der Borsch war gut. Dess Kättche moont: Scheene Sache hawwese widder gebrocht im Zuch. No gut, die Prunkwaache mett dene Komiteeter misse halt soi, awwer om meisde Spaß mache halt immer widder die Privatgruppe. Was die sich immer oifalle losse! Unn was die sich ferr Arweit mett ihrne Kostüme mache, die misse doch all erstemol entworfe unn genäht wern, jed Johr was Neies.

Moi Fraa hott gesacht: Dass dissjohr hier in de Hauptstrooß so richdisch was los gewese iss hott aach doodemett ze due, weil jetz noochem Zuch uffem Kerchplatz noch e Party gefeiert werred.

Ich habb gegrinst. Wennse nor enn onnern Nome ferr die Party hädde.

Die Paula guckt mich oo. Was hawwese dann ferrn Nome ferr die Party?

Ihn Monn, de Karl, hottse uffgeklärt. Ei geschriwwe werrds After Zug Party, awwer wennde dess Wort After saache musst, dann saachsde entweder Affter, dess iss was Medizinisches, ooder du saachst Aafter, dess iss Englisch unn heeßt hinnenooch.

Ich habb immer noch gegrinst. Also dess wärs wert, dass de Nannclub dess ännern det. Mir sinn doch in Flerschem, unn grad de Nannclub hott sich in letzder Zeit ferr die Flerschemer Sprooch unn Aussprooch stark oigesetzt, dann soller aach ferr die Party enn Flerschemer Ausdruck finne. Warum macht merr nit: Noochem-Zuch-Feier? Dess klingt besser als so e Gemisch aus Englisch unn Deutsch. Wenn dene dess nit gefällt kenntese joo aach dorch die Flerschemer Zeidung emol die Flerschemer Leit frooche, dem oone odder onnern det villeicht noch enn bessere Ausdruck ferr die Feier oifalle.

De Karl guckt mich oo. Honnes, du wollst doch nix mehr iwver die Flerschemer Fassenacht saache, was issen heit metter los?

Ich war gonz erschrocke, habb merr uffs Maul gehaache unn habb in die Rund geguckt. De Karl hott joo Recht. Awwer was ich ewe gesacht habb, dess misster joo nit weitererzähle. Aach du nit, Kättche, gelle?

Eiern Honnes